

PAGTULON-AN 5 - ANG DALAN NABAHIN DIHA SA MGA ESKINA SA KALIBUG

Genesis 11

TEMA: Pagpakita sa pagkahinungdanon sa paglakaw diha sa kahayag ug pagpahiuli sa pagpakig-ambitay sa usag-usa.

Unsa para kanimo ang labing maayo, gabii o adlaw? Ngano nga kadaghanan kanato gusto man sa mahayag nga adlaw? Kay gusto kita makakita asa kita padulong, unsa ang atong gibuhay ug unsa ang ginabuhay sa uban. Ikaw nga gusto sa gabii, makagusto ba gihapon, kon walay bulan ug mga bituon? Ang gabii dili maanindot kon wala ang mga suga diha sa kalangitan, maingon man ang adlaw dili matahum kon wala ang siga niini.

Ang Bibliya nag-ingon, nga ang Dios kahayag ug diha Kaniya walay kangitngit, 1 Juan 1:5. Ang kahayag kanunay nagasulti kanato mahitungod sa Dios ug pagkamatarung, samtang ang kangitngit naghulagway usab mahitungod ni Satanas ug sa pagkadautan. Ang Dios gusto nga ang iyang mga anak magalakaw diha sa iyang kahayag.

Karon, magatoon kita kon ang mga anak sa Dios nagalakaw ba diha sa kahayag o sa kangitngit human sa dakung lunop. Ang lunop milaglag sa tanang mga tawong dautan busa ang Dios misugod diha kang Noe ug mihatag kaniya ug bag-ong balaod sa pagpanaw, Gen. 9:1-19. Si Noe gisugo sa Dios nga magdaghan sila ug pun-on nila ang yuta, Gen. 9:1, 7. Gidugang sa Dios kanila ang pagkaon sa karne, samtang sa wala pa ang lunop prutas ug utanon lamang ang ilang kaanon, Gen. 9:3. Ang silot sa pagpatay ug tawo mao ang kamatayon.

Ug unya ang Dios naghimo ug pakigsaad uban kang Noe nga wala nay unod nga pagalaglagon pinaagi sa lunop sa tubig, wala nay lunop pa nga molaglag sa yuta. Ang Dios mihatag sa balangaw ingon nga timaan sa maong pakigsaad. Si Noe ug ang iyang mga anak, uban sa ilang mga asawa, mipadayon sa pagpanaw sa *DALAN SA KINABUHI*. Ang kaliwat ni Noe misanay sa hilabihan gayud. Ug ang matag usa nagasulti lamang ug usa ka pinulongan, Gen. 11:1.

Samtang sila nagapanaw gikan sa silangan, nakakaplag sila ug patag didto sa yuta sa Shinar. Ug nanag-ingon sila, “Umari kamo, magbuhay kita ug tisa ug pagbahon ta ug maayo. Umari kamo, magbuhay kita alang kanato ug usa ka lungsod ug usa ka tore nga ang iyang ibubungan muabut sa langit, ug kita magabuhay alang kanato ug usa ka ngalan, kay tingali unya kita pagpatlaagon sa halayo sa tibuok nga nawong sa yuta,” Gen. 11:3-4.

Dihang mikanaug ang Ginoo aron sa pagtan-aw sa tore ug sa siyudad, daku kaayo ang lyang pagkasubo tungod kay ang pamilya ni Noe wala mipuno sa yuta sumala sa gisugo kaniya didto sa Genesis 9:1. Ug ang Dios miingon, “Ania karon, sila usa lamang ka lungsod ug may usa lamang ka pinulongan silang tanan, ug kini mao ang ginasugdan nila pagbuhat, ug karon walay bisan unsa nga makapugong kanila sa ilang ginahunahuna nga buhaton. Umari kamo, manganaug kita ug lahugayon nato ang ilang mga sinultihan aron sila dili na makasabut sa sinultihan sa usag-usa,” Gen. 11:5-7.



Tinubdan: Sweet Publishing – kini ilustrasyon lamang sa Genesis 11:7-8

Ang Ginoo nagapatibulaag kanila gikan didto ngadto sa tibuok nawong sa yuta. Ug ilang giundang ang pagtukod sa siyudad. Ang maong dapit gitawag nga Babel. Kini nga ngalan gikuha sa pulong Hebreohanon nga “*balal*”, nga nagakahulogan “kalibug”, Gen. 11:9. Didto sa atong mapa ato kining gitawag nga ESKINA SA KALIBUG.

Kini nga paglahugay sa pinulongan nahitabo usa ka gatus (100) katuig human sa lunop. Ato kini mahibaloan tungod kay si Shem nahimong amahan ni Arphaxad; duha (2) katuig ang milabay human sa lunop, Gen. 11:10. Si Arphaxad nahimong amahan ni Salah, trayntay siyete

(37) katuig ang milabay human sa lunop, Gen. 11:12. Si Salah nahimong amahan ni Eber, saysentay siyete (67) katuig human sa lunop, Gen. 11:14. Ug si Eber nahimong amahan ni Peleg (ang buot ipasabut, *napikas* sa Hebreohanon) usa ka gatus ug usa (101) katuig human sa lunop, Gen. 11:16. Kini gipamatud-an sa Genesis 10:25, diin atong makat-onan nga sa mga adlaw ni Peleg ang yuta nabahin.

Karon unsa man ang buhaton sa Dios? Ang katawhan gihatagan na ug kahigayonan apan napakyas lang gihapon, busa gipasagdan sila sa Dios diha sa ilang kasal-anan ug pagkadautan, Roma 1:24-28. Ang mga tawo nga ginatawag nga kanasuran o *mga Gentil (dili mga Judeo)*, tanan miadto sa DALAN SA GENTIL didto sa atong mapa. Ang tibuok nga kaliwatan sa mga tawo mipili sa dalan nga daw matarung sa ilang kaugalingong mga mata, apan napamatud-an nga dalan diay kini sa walay katapusang kamatayon.

Ngano nga kini nga dalan paingon man sa kamatayon? Kini tungod kay ang tawo misupak man sa Dios, ug wala mosubay sa dalan sa pagtoo. Sa dihang nanag-ingon sila, “Magabuhat kita ug tisa ug magbuhat kita ug tore.” Nagabuhat sila ug bulohaton alang sa ilang kahimayaan; ug dili alang sa kahimayaan sa Dios. Daghang mga tawo karon nga nagatukod ug tore uban sa mga bato sa *maayong mga buhat*, ug nagasalig sa maong mga buhat nga maoy modala kanila sa langit. Ang Dios nahimuot lamang diha sa mga buhat sa pagtoo.

Sa dihang nanag-ingon sila didto sa Genesis 11:4, “Magabuhat kita alang kanato ug usa ka ngalan,” gipakita nila nga dili sila gusto magadala ug magahatag pasidungog sa ngalan sa Dios. Sa diha nga ang tawo magasimba sa ilang kaugalingon nagadala kini ug kalibug ug kini nagaguba sa panaghiusa diha sa Balaang Espiritu. Sa dihang nanag-ingon sila, “...basig pagpatlaagon kita,” mirebelde sila batok sa sugo sa Dios nga pun-on nila ang yuta. Ang pagsupak nagadala ug kalibug ug paghukom sa tawo.

Diha sa atong pagpanaw, moliko kita sa wala diha sa ESKINA SA KALIBUG ug atong tan-awon giunsa sa Dios pagtawag ug usa ka tawo aron mohimo ug bag-ong pagsugod diha sa DALAN SA SAAD.

Nagalakaw ka ba diha sa kahayag? Kon wala ka pa mobutang sa imong pagsalig kang Jesu-Cristo; ingon nga imong kaugalingong Manluluwas gikan sa silot sa sala, saligi Siya karon. Ang dugo ni Jesu-Cristo, ang Anak sa Dios, magahinlo kanato gikan sa tanang mga sala. Kon ikaw usa na ka magtotoo, apan nadalin-as ka, sultihi ang Ginoo pinaagi sa pag-ampo. Gipasaylo ka na Niya sa tanang nimo mga sala, Colosas 2:13. Kon ikaw nagalakaw diha sa kahayag, ang pakig-ambitay mobalik aron ka kanunay na nga magalakaw ingon nga kahayag diha sa kangitngit dinhi sa kalibutan.

SAG-ULOHON NGA BERSIKULO: “Apan kon kita magalakaw diha sa kahayag, maingon nga Siya anaa sa kahayag, nan, kita may pakig-ambitay ang usa sa usa, ug ang dugo ni Jesus nga Iyang Anak nagahinlo kanato gikan sa tanang sala.” 1 Juan 1:7.

PAGTULON-AN 5 – BULOHATON

Direksyon: Isulat ang hustong tubag sa mga pamahayag o pangutana.

1. Isulat ang tulo ka mga bag-ong balaod sa pagpanaw nga gihatag sa Dios ngadto kang Noe. Genesis 9:1-7.
 - a) _____;
 - b) _____;
 - c) _____.
2. Sa dihang napuno na usab sa mga tawo ang yuta, unsa ka daghan ang ilang pinulongan? Genesis 11:1. _____.
3. Unsa man ang gibuhat sa kaliwat ni Noe sa dihang nakakaplag sila ug patag didto sa yuta sa Shinar? Genesis 11:2-4. _____
_____.
4. Unsa ang gibuhat sa Dios sa dihang mikanaug Siya ug nakita Niya ang siyudad ug ang tore? Genesis 11:5-8. _____
_____.
5. Ngano ang Dios wala nahimuot sa kaliwat ni Noe dihang nanag-ingon sila, “Magabuhat kita alang kanato ug usa ka siyudad ug usa ka tore?” Genesis 11:4. _____
_____.
6. Nanag-ingon usab sila, “Magabuhat kita alang kanato _____.” Genesis 11:4.
7. Ang ngalan sa siyudad nga giundang pagbuhat sa mga kaliwat ni Noe gitawag nga _____. Kini nga ngalan gikuha sa pulong Hebreohanon nga *babal*, nga ang buot ipasabut kalibug. Genesis 11:9.
8. Ang pamilya ni Noe wala maglakaw diha sa kahayag sa Dios, busa wala silay _____ uban sa Dios o sa usa ug usa. 1 Juan 1:7.
9. Basaha ang Roma 1:24 ug isulat unsa ang gibuhat sa Dios ngadto sa mga Gentil human sa ilang pagrebelde. _____.
10. Isulat ang 1 Juan 1:7: _____

_____.